

松山先生事略

松山君者，讳荣，字远耀，昆季有二，而君其长也。性耿直豪迈，精明浑噩。事继母孝谨，里闾无间。言幼有卓识迥异乎，人不事章句，儒研究农林学，彼时乡者弗齿。迄今洞悉君之所为第一种学问，辟当世之津梁，启后人之管钥，功业足以传于世也。凡宇内碌碌鲜为者，没与草木同腐奚可同日语哉。君治家绳以法度，严肃整洁，课读隆师，反近世仕宦其家者，鲜能臻此。

余自京师南旋谒其君，冬一裘夏一葛，与二三野叟醉歌田舍，笑话桑麻，巍然恂恂长者也。君配孺人李氏，敬恭慈惠善能相助，课子有道，宾祭有经，与几范陶仪并称巾幗中可风矣。子有五，孙有十八，曾孙二，业儒业农均有其人。惟仲子字待选号阁承，崇儒重道，继乃父志乐输产以助学，锡褒章以荣宠。于是智识无有及者，桑梓中罕其匹也。予所知者谨以志焉。

候老孺人赞

世称贤妇，全曰周姜，载诸女史，古今不忘。惟我节母堪与颉颃，温柔淑慎，静一端庄，鸡鸣巾栉，敬事姑嫜，鸿仪案举，内助夫纲，持家勤俭，处世慈祥，延宾截发，教子义方。昊天不惠，君子早亡，年仅廿五，节励冰霜。艰贞自守，寿而且康。七旬晋八，鹤算无疆。孙曾绕膝，四代同堂，诗书裕后，寝炽寝昌。卓哉。节母百世流芳。